

中
華
書
局

建
大
學
國
語
學
系

建
炎
維
揚
遺
錄

撰人不詳

中
華
書
局

建炎維揚遺錄

此據學津討原本
排印初編各叢書
僅有此本

四庫全書提要

建炎維揚遺錄一卷。不著撰人名氏。記高宗建炎二年冬至次年三月事。自高宗建炎元年十月如揚州。至三年二月如杭州。此所記者。由揚入杭之事。故以維揚爲名。文獻通考云。戊申維揚錄一卷。無名氏。戊申卽建炎二年。當卽此書也。別有維揚巡幸記一卷。自二月初十日以前。與此本字句小異。而敘述盡同。惟無錫令任謙。逸其名姓。初十日以後。則至十五日而止。凡此所載。詔書悉不錄。蓋一本而傳寫互異。又有所刪竄於其間。不及此本之詳也。

建炎維揚遺錄

建炎戊申冬，自鄆濮相繼陷破之後，金人橫行山東，加以李成諸寇乘亂爲孽，不可悉數。黃潛善濫秉大政，汪伯彥謬居樞筦，裁處無術，探謀不明，未嘗得諸賊要領，亦恬不介意。是致胡寇奄至，無以應敵。十二月十九日，黃潛善遷左僕射，汪伯彥遷右僕射，盧益知樞密院。自是之後，宿泗間屢有警報，而諸公皆謂小盜易爲殄滅，或李成餘黨無足畏也。先此李成後軍在宿泗叛亡，成以追奔爲名，遂與俱反。朝廷遣劉光世出軍討賊，光世既至山東，與成接戰，王師被圍，幾至敗績。統制苗傅力戰得脫，成軍遂潰，擒賊將數人，而成一軍俱走。光世歸至行在，以功加檢校少傅，而李成之聲尙未解也。及是宿泗之報，人皆指爲敗亡之餘，蕃寇知朝廷之去就，亦多僞稱李成之黨，以緩我師，而執政無知，果墮其計。二年正月三十日夜，得泗州閻僅申有三十餘騎，僞作番裝，見已殺走，乃以所得首級器具俱來。是夜，朝廷薄饗，內廷通夕般運，翌早駕御舟涉河，居人惶怖，罔知所爲。上卽欲南幸，時潛善力勸上，且俟探報得實渡江，上然之。少頃，又傳閻僅自反，已卽時梟首矣。僅之反也，先與蕃兵接戰不利，遂畏而叛，而蕃人聞僅之叛，乃謂罔有爲己敵，故猖狂驟至，更無持重。長驅直抵淮口，是日行在遣劉光世領兵出至淮河拒賊，人謂劉三必能了事，不期將不用命，士無鬪志，聞風遁走，無復決戰。由是維揚居民始挈老幼奔突，爭門出城，相踐以死者不可勝計。金銀之價，長至數倍，在職百官，悉皆倉皇，無有計畫，侍從間有至堂中詢潛善、伯彥者，二人俱

對以自有措置。諸公無畏也。百官既聞此語。乃復自相慰諭。以爲知事實者。莫如宰相。今既所云如此。必未可輕動。百姓聞之。亦以爲然。及忠出不虞。所以多喪家屬。自貴及賤。無不歸過潛善。怨入骨髓。皆欲與之俱亡也。是夜。江都縣大火。徹旦。營幕輩往往盡焚其居廬。初二日。居民般挈逃竄。行路之人。摩肩疊武。二月初三日。已刻得天長報。始知蕃賊至上聞之。乃身披甲冑。匹馬出門。唯內侍五六員護聖軍。隨行者數人而已。上天性慈仁。亦未嘗呵止百姓。第與路人相先後。觀者無不駭歎。申剡渡江至京口。宿府衙。先上起維揚時。潛善伯彥尙在堂中會食。或有審其事實者。猶以前言爲對。及堂吏報急。稱駕已起矣。二人始趨出。驅馬前馳。自此官吏百姓。出門致死。至於相籍。比前三日又數倍矣。將晚。蕃人至楊子橋。應係官私般載。舳舻無慮萬計。悉爲虜人所有。初四日。賊至瓜洲。貴賤未渡江者。十猶五六。賊既緊迫。奔迸溺水死者。不知其幾何也。婦女被驅虜。願死不去。有虜而去者。又不知其幾何也。金帛珠玉。捐弃江岸。如堆山阜。非金人卽爲無賴輩所得。渡江之人。至有三百里得濟。初城中邊報來。奔出城者。皆以得運河舟行爲利。及賊忽至。潮不應聞。而四十里之舟船。悉盤礴泥鹵中。故賊得縱所欲。如魚鳥之在網罟。可以探手取。王侯之族。婉冶之姿。盡流異域。官府案牘。悉爲煨燼。片紙不留。上至乘輿服御。盡皆委棄。兩府侍從之家。或身死兵刃。或父母妻子離散。兄弟不相保。自古及今。未有此境界。大卿黃鶚渡江至京口。軍人呼之黃相公在此。誤國誤民。皆汝之罪。譌方辨其非是。而首已斷地。史徽范浩繼至。亦死。待制李處遜。給事中黃哲。一時被害。上平時每以北方未寧爲念。面諭潛善。欲將左藏庫金銀絹帛。旋船赴江寧府。以備不虞。聖

慮前知警懼如此。而潛善愚暗。不知事機。且曰。如此恐搖百姓。姑待之。至是星雨不存。應上卽位之後。天下奉表貢獻禮物。所積匹兩。無慮數萬計。一旦掃盡。建炎之後。所在調發人兵。及行在蒐簡軍人。精銳之衆。不下十餘萬。潛善天資強狠。倜儻傲日肆。蔽賢害能。未嘗禮一賢士。天下怨嗟。人莫爲用。故禍起倉卒。盡爲弃甲曳兵之人。自渡江以南。三軍怨家屬之不相保。更無親上死長之意。所思者爲亂而已。皆潛善之誤國也。于時賊至瓜洲。縱暴上聞之。卽趨丹陽。晚頓。自駕起鎮江。居民奔走山谷。城中一空。無賴輩與軍人縱意劫虜。錢帛填委街衢。無敢爲主。幾至大亂。自此以後。南來之人。扶老攜幼。如蜂屯蟻散。父母兄弟。妻子多不相保。遞相哭泣。遍滿道路。聞者莫不痛心。怨憤之氣。充塞上下。初五日。駕起丹陽。至常州。晚頓。百姓離丹陽。多由小路。招安人丁一箭名進者。縱所部兵。自小路肆爲劫掠。大尉王淵領兵進自毘陵。一箭聞之。欲引兵亡入山東。淵覺。遂傳語進云。兵卒劫掠。非汝之過。命招集叛亡。前會常州。進至立馬前。數其罪斬之。簽首以徇于衆。人皆惕息。初六日。駕起常州。至無錫。晚頓。縣令任謙。供辦整肅。有同宿命。上再三稱獎。自駕起鎮江後。所過之地。無不殘劫。人以爲戒。率前期入山。以避其亂。凡州縣井邑之地。罔有闕戶安居者。以故軍人所過。愈肆暴戾。米鹽之類。所取之餘。則弃諸通衢。與糞壤無異。務趨傾覆滿道。汪洋可涉。每所經處。煙焰亘天。十室九空矣。獨無錫令制御有術。居民不遷。市井不變。軍人憚之。無敢爲亂。人咸稱爲賢宰。初七日。駕至平江府。府中富民私或遁去。然市井貿易如故。到此者咸有生意。上至府中。始去介冑。易黃袍。儀衛稍增。於是日下詔曰。朕以單微之質。蒙世大難。賴臣庶共戴。獲承祖宗之餘。念必宅

中經遠。均布惠澤。以慰萬邦歸往之心。故雖外迫於敵兵。誓不違離於近甸。省刑薄斂。拊士與民。不以一毫擾郡邑。行再葺矣。輸誠盡禮。遣使相望。而敵未寢兵。還將練師。朝夕從事。而力不逮志。自聞長驅之謀。議者請適東南遠險之地。以保朕躬。朕寧不免於敵。不忍先事苟生。弄我西北之人。而遽遠引也。故出兩道之師。外爲蔽援。而嗣遣將命之臣。所保赤子。以待敵心之易慮。則共圖康居日。可見計矣。人力雖殫。天道難度。大名東平。相繼陷失。始命將佐絕江自便。朕猶遲延不先。俟天人之我相也。迨輕騎潛行。不日遽至於近城。始挺身東行。由江潮爲暫避之計。凡乘輿服御。若帑藏之積。一切弃捐。二三大臣至。不能保其家室。念雖顛沛至是。而不負中原西北之人。朕心猶庶幾焉。與其謀已忘民。患未及而去。則不得已而後動。猶愈乎。但聞官吏軍民。雖有自便之詔。多不及避。生計蕩然。或不得與其家偕來。痛切朕心。負負何極。自昔帝王脫身於皇遽之時。而立國於顛危之後。失勢於屢挫之辱。而截難於一勝之功者。尙多有之。夫農不爲水旱輟耕。士不爲貧窮怠其道。朕能勞形克己。至死不渝。圖保生民。而不能使吾民之遽安。能側身修行。以己贖民。圖格天心。而不能保天心之必相。尙賴卿士大夫。暨爾萬方有衆。戮力一心。式孚于帝。庶迄成績。咸保康乂。朕誠切至。宜察朕心。初十日。駕方起姑蘇。晚次吳江。留丞相朱勝非侍郎張浚彈壓蘇城。除呂頤浩同知樞密院。充淮南兩浙經制使。十一日。次秀州。十二日。次崇德。十三日。到杭州。以府衙充行宮。以顯寧寺爲尙書省。然百司官吏隨駕至府者。十才一二。三省六房。殆百餘人耳。所以行在職事。一切未具。十四日。下詔。朕以菲躬。獲承大統。萬方請命。未能解塗炭之憂。二聖蒙塵。莫獲親晨昏之養。兵

已練而力屈。脩雖設而用違。震于朕心。罔知攸濟。實由涼德。未究遠圖。仰無以當上帝之意。而禍亂遺臻。俯無以得百姓之心。而流亡失所。比因強敵深入近畿。退保江津。以揆畿甸。事出倉卒。人用震驚。衣冠頓踣於道塗。帑藏弃捐於兵火。嗚呼。皇天后土。豈不照朕之精誠。志士仁人。豈不卹朕之懇惻。儻以昧陋。難弭凶災。請降罰于朕躬。以謝罪於率土。尙以國家歷數之未艾。祖宗德澤之在人。未至淪亡。必將恢復。益當洗心改事。雪涕輸誠。悉去靡文。務從簡素。屏斥細務。專事戎兵。明告庶邦。暨於列位。忠言可以規朕之過失。長策可以救國之傾危。毋蘊於中。悉以上達。廟堂近服。各務交修。藩翰諸侯。深思夾輔。將帥致爪牙之用。黎民保父母之邦。思扶顛而持危。用興仆而起壞。庶資多助。馴致不平。咨爾萬邦。欽予至意。又下卹民詔曰。朕倉卒南渡。致士夫弃其家屬。禁衛諸軍。老小不時濟渡。頗聞逼擾。尙有未達行在者。雖累勅劉光世。王淵。多以絹帛堆垛江口。賞募舟人。日夜渡。猶恐既渡之後。徒走顛仆道路。仰康允之。日下撥在岸空糧船五十隻。先支一月。請授選差使臣二員。給券管押。明立旗號。前去常潤。以裝載南來之人。令早至行在。朕以此未敢獨享宮壺之安。仰有司於殿後別設御閣。朕當自處其中。以待衣冠兵衛士庶老小咸達行在。方御寢殿。仰三省日下出黃榜曉示。又下詔曰。朕以涼昧。荐歷艱險。深惟不德。天未悔禍。是以倉猝南渡。駐于江湖。念國勢之益削。慨宗社之僅存。雖政事宜有改更。在朕躬尤當省懼。自今以往。當益務勤畏儉約。脩德立政。庶幾上當天心。轉禍爲福。下愜人意。易危爲安。所有應緣供奉禁省事。專屬朕身者。如儀物之飾。膳羞之奉。仰有司痛行裁損。必遵菲薄。其後宮除有職事掌管人。不可減放外。其餘悉行。

減放各聽從便。仰三省行下。體朕至誠之意。十六日。聖旨許侍從及寺監長貳限兩日舉見近在行及遠方有才術賢士大夫二人。十七日。大赦天下。十八日。百官朝會。應杭州寄居迪功郎以上。並許赴朝。臣僚上言。數潛善。伯彥二人罪。二十日。黃潛善出知江寧府。汪伯彥出知洪州。葉夢得除左。張徽除右。二十一日。朱勝非。王淵赴行在。二十二日。臣僚再章謂潛善。伯彥敗壞國家。頗危至此。今各以美職出鎮大藩。衆議喧騰。二十五日。潛善。伯彥俱落職。宮祠。二十六日。陳東。歐陽澈並贈承事郎。與有服親。迪功郎一人。所居州縣。存卹其家。馬伸召赴行在。先伸痛言潛善。伯彥罪惡。數奏不聽。竟謫漢州監酒。意其必死也。至是汪。黃誤國。果如伸言。上思伸前章懇切。始詔召。二十七日。王淵自平江來。承宣使張俊領兵把隘吳江。兵怨之。俊渡揚子日。脫身獨走。致失家屬。欲殺俊。俊遜謝得脫。奔至行在。上釋之。却令再往招集軍衆。二十九日。右丞朱勝非至自平江。三月一日。除勝非。右僕射。王淵簽書樞密院。葉夢得罷三省。同奉聖旨。昨金人逼近。倉卒南渡。暫至錢塘。勢非得已。每念中原。未嘗終食敢忘。今累據探報。金人軍馬歸回。已離揚州。錢塘非久留之地。便當稍進務要。駐江寧經理中原。可於四月上旬。擇日進發。應江寧府合預排辦公路。順程等事。有司疾速施行。盡從簡便。不得騷擾。差康允之措置。厥後史官載之典冊。此不復書。